

ديوان

"وبقينا ماضي"

اسم الديوان: "وبقينا ماضي".

اسم المؤلف: محمد عماد الدين .

تدقيق لغوي: دينا عبد الله .

تصميم الغلاف: محمد دربالة .

إخراج داخلي: ساندې شريف إبراهيم .

رقم الإيداع: 2021/2371

الترقيم الدولي: 9789778441602

جميع الحقوق محفوظة للناسر اى اقتباس أو تقليد أو إعادة طبع أو نشر دون موافقة كتابية يعرض صاحبه للمسائلة القانونية والآراء والمادة الواردة. وحقوق الملكية الفكرية بالكتاب خاصة بالكاتب فقط لا غير



Email: ebharpublishing@gmail.com

تليفون: ٠١٠٦٠٢٦٧٤٠١

محمد عماد الدين

ديوان "وبقينا ماضي"
(واللي راح يا حبيبي راح)



إهداء...

إلى أمي التي فعلت من أجلي الكثير، ولا زالت تَبْثُّ في
أعماق روحي العزيمة والإصرار...

إلى جمهوري العظيم وكل من قدم لي الدعم، لولاكم بعد
فضل الله أولاً لما كنت هنا...

إلى الروح الغائبة عن عالمي ولكنها ما زالت تسكن بين
ضلوعي...

محمد عماد الدين

ليالي القاهرة



زمان..

واحنا صغيرين

كنت نسمع عن مدينة كبيرة

أهالينا كانوا يقولوا:

مكان ماليه الدوشة

ومن كتر ناسه؛ تتوه في الزحمة

نسمع عن بطولات كانت

وقصص بالفعل حصلت

قبل التاريخ الهجري

وقبل التقويم الميلادي

من مينا لرمسيس للأهرامات الثلاثة

الفراعنة ثم التاريخ القبطي ثم دين السلامة

قاهرة الأعداء؛

مقبرة لكل اللي صورت ليه نفسه

الاعتداء..

ونكبر والحلم يبقى حقيقة
وكل اللي اتوصف تشوفه عنيك
وتسافر ساعات وساعات
حماس شباب في العشرينات
هروح، هقابل، هحاول، هجرب
سمعت إن هناك كل شيء مباح
يمكن أحقق أحلامي
وأعيش اللي باقي من عمري
ميهمش إني غريب
ولا ده وطني ولا ليا حبيب
ومالو أكمل وحدي
وأعرف ناس جديدة
إنها القاهرة السعيدة
مكان الحب القديم
وشوارع بطعم الأنين
بداية القصة، وشكل القصة، وصبية تملأ العين

فرحت إنك لقيت شريك
وقت الحزن تحكي له يحتويك
وأوجاعك إن زادت؛ يشيل عنك
بنبرة حب يقول أنا وياك

شاري قلبك، وقلبي معاك
وأنا ليك ممتن
ولو لفيت بلاد الدنيا؛
ألاقي ازاي أنا غيرك؟!
يا حب ساري في الوريد
ده كل الناس في كفة
وأنت الكفة اللي بيها يزيد

ليالي القاهرة
على قد ما طعمها حلو
طعمها ليا أنا مرّ
وبعد ما كنت بقيت مستغني
هنا وهناك ذكرى تملّي توجعني
ورجلي تخوني
ألقاني بمر على دارك
أفتكر وقت ما بعثني
ورضيت ذمتك
اللي احنا فيه ده اختيارك

ليالي القاهرة
بردها قاسي

نسيم وقت الفجر
يلفح صدري
يفكرني بليالي الهجر
تؤهلني بين الناس
وإحساسي بالغربة بين ناسي
كنت ليا الوطن
وفجأه لقتني براه
كنت فيك عश्مان
وسبتني للحزن ينهش فيا
وشوفتك واقف تقول الله

هفني الشوق أزورك
وأسمع منك كلام
في وقت بكون محتاجك
لما الدنيا تقول لي سلام
أول صورته ليك
لسه بقلب فيها
وألوم على نفسي
وحينني لحاجة خلاص
مليش حق فيها

قوليلي أعمل ايه؟

لو توحشيني

ولما تباني في عيوني

ولما يقولوا اسمك

فتقفل جفوني

خوفًا.. من دمه تنزل

وعنك يسألوني

أخيرًا..

القاهرة بلد العجايب

موطنك، لما تلاقي الكل سايب

سيبتها وقلبي لسه فيها

يمكن نزول المسافات

وتتلاقى الحبايب

ليالي القاهرة بردها قاسي..

وأتمنى لو أنساك..



ضابقت بيا الدنيا
ملقتش حزن يسعني
أحكيه ع اللي جويا
يسمع همومي يفهمني

هاتلي كل اللي فات
وعيدلي حبي اللي مات
يمكن بعد طول الوقت
ننسى الآهات..

ادّيني فرصة ثانية يمكن أصلح
كل الخراب اللي سببته جواك
خلصت فيك ومعاك كل الفرح
صدقني أنا حتى هذا الوقت بهواك

قولي ازاى أشوفك لغيري وأرتاح

وأحس إني ف براح
تعالى عاتبني غربني ونسامح
يمكن نعيد اللي راح

ميهمش أنا مين
ولا بشتاق لمين
حنيني كله أنين
كل اللي فات زادني ألم
واللي جاي من عمري حزين

عاوزني نرجع تاني واحد
من بعد هجرك بقينا اتنين
صعبان عليا أقولك حبك كان
والحب ف قلبي ضعف زمان
وأنت معايا في كل مكان

كل الناس بقت بعدك كأشخاص باهتين!
ندر عليا ودين
لا عمر قلبي يلين
ولا يحس حنين
لأي واحدة حتى يوم الدين

كل الناس بتلومني عليكِ
قلبي يقولني نفسي ألاقكِ
نفسي أبطل أفكر فيكِ
وأتمنى لو أنساكِ
عمري حبيبي ما هنسى هوالكِ..

خدي مني الوردة دي
أسف دبلت بقالها كتير
بس بحُبكِ جازيز تزهر
وترجع فيها الروح من تاني

وجيتي ع بالي..



وجيت ع بالي
جيت إي؟!
وأنت طول الوقت ويايا
وخيالك يروح وييجي
وقلبي في حبك عايش حكاية

مقدرتش أنساك
ولا أني أبقى سعيد
وأتمنى لقاك
ونقول تاني ونعيد
نفسي أبطل أكتب لك
واتخلص من ريحتك
وانسحب من فيلمك
واعتزل حبك
ويوماتي بهرب منك ليك

ما تيجي نكرر الغلطة
ونسرق م الزمن دقيقة
ونعيش القصه إياها
ونرجع ولو لحظة
ونطلع مشاعر مكبوتة
ونتمسك المرة دي
وقبل النهايه بخطوة
نعيد القصة السعيدة

وحلّفت الليل م يطول
ويعدي أوام علطول
ده قمري كان طالل
وسابني في حكايات أقول

مكتوب علينا الحب المتبوع بفراق
وقلوبنا حزينة شايلة حنين واشتياق
ونعيش فدائرة
مين هيفتح قلوبنا تاني؟
مين هيصالح قلب من الوجة مات

معقول مش هنعود أحباب
معقول بقينا اتنين أغراب
معقول عمرنا فات
معقول اللي بينا مات
معقول هأقول الشوق غلبني
وإن الهوا صحيح غلاب
معقول هقول ده نسيني
ولا عمل ليا حساب

الحب خيبة كبيرة
كمل حياتك وحيد
ده اللي قلبك رايده
بدأ تاني من جديد

قابلتك صُدفَة



شوفتك من بعيد
ولسّاك زي ما أنت جميلة
ولسّاني عاشق وما باليد حيلة
وبين الناس أُميّز ضحكيتك
يهفني شوقي أرجع تاني لدنيتك
وأتمنى لو صدفة تقابليني
وحضن منك ليا يقويني
ياريت اللقا بإيديا
كنت حبيبي جيت
وعنيك تلمح عنيا
ونكون اتنين في نفس البيت

أقولك ايه؟
ونفسك تسمعي ليه؟
وتعيشي حكاوي قفلتيها
وجاية تقولي ندمانة
والليله اللي بدونك.. طعمها مرّ

بعيط عليك وأناديهم باسمك
فيرد عنك طيفك
تبتسم فابتسم وأوام أغازلك
وتفوقي من وهمك يا صب
اللي كان وياك
خدتہ الدنيا لدنيا تانية

مكسور الجناح
وعايش .. بس مش مرتاح
أبان عادي
أهزّر وأضحك يوماتي
وأخبي الكسرة جوايا
وأداري الحسرة في عنيا
ياريت الحب بإيديا
فأمنع روحي تشتاقلك
وأمسك لساني يندهلك
وأبعيد بعيد عنك
فتحس بحيرة وحرمان
وترجع تاني تتمنى
وتقول .. ياريت اللي جرى ما كان

كثير الكلام
ما بين سايب
وبين إني متساب
وهرد بإيه؟
إنك بعتي كل الود
وإنك خذلتي هذا القلب
وإنك ناسية الليالي
ومانة خيالك يزورني
ولا يخطر على بالي
فأبين إني متساب
وإن العيوب فيا
وأقفل ببيان العتاب
واللي راح راح... مبقاش ليا

فلاش باك
أول نظرة شوفتك فيها
وأنت هناك
ومن وسط كل العابرين
كتتي لي قشة نجاة
لقيتك ومن بعدها شوفت الحياة
قابلتك صُدفَة

والصُدفة بألف معاد
فراحلك قلبي بدون عتاد
وشقلبتي لي الموازين
وزاد العشم فيكِ ضعفين
ووقفت الدنيا عليكِ
وقبلك مكنتش عايش
وكتبت الشعر في عينكِ
وغيرك مكنتش شايف

وأحس بوجودك معايا
في عز الغربة تقويني
يا أجمل بنت في الدنيا
جمال الدنيا زاد بيكِ
وهي الدنيا تكون دنيا
بدون مَ اتوه في عينكِ

رديلي قلبي ونتفاهم؟
هقولك وقتها كلام
وإني شاريكِ ضعف زمان
وإني بدونك ولا شيء
وإني بحبكِ حب غريب

يمكن أضْمِك وقتها
فترضي عليا وأشوف الهنا
يا ضحكة ما فارقت البال
وصبية ما شافت عنيا زيها

براقبك من بعيد..



إشتقت لك ونسيت أنساك
أقولك إني حبيبتك
وإنك خدت قلبي معاك
حياتي مسروقة مبقتش ملكي
وبقيت شخص مش معروف
عمرى ضاع، ومين يرجعني؟
أكون من تاني شخص مألوف

براقبك من بعيد
حرميني الدنيا وصالك
بشوف صورك خلصة
بتابع لسه أخبارك

سمعت الحب ف أغاني
وروايات كتير قرئت
سرحت كتير بخيالي

ويارتني ما اتمنيت
وأنت معايا كان كل شيء بيهون
وقلبي معاك كان مَصون
تغيب وتقولي مَش قصدي؟
وتثبت إن محدش مضمون
بعت كل الدنيا دي فداك؛
وبعت حبي بدراهم بخيسة!
كدهب من برة جذاب، والأصل صيني
وغلطة العاشق حياة تعيسة

وأحس بيك برغم المسافات
ده روحك عندي ساكنة
ونقعد سوا نفتكر ذكريات
مكتش صالح بما فيه الكفاية
وكل يوم خناقة وحكاية

كنت عصبي وأنااني
غيار بزياده ع حاجة بتاعتي
رجولتي مكتش تسمح
إلا تكون عشاني

وكلامي يتلغبط
ورعشة إيديا سبقاني
برغم إني نسيته!
وقدرت أنسى هواك!
وف لحظة لما أشوفك
أتمنى لو إني كنت معاك

يا أجمل كاس ويسكي لمزاج سكران
يا حبي اللي خد عمري وطلعت أنا خسران

وعدتك إني هبقالك
هكونلك عنين تحرسك
ووقت الضيق صديق
وساعة الحب أحلى حبيب

كان بيني وبينك
ألف خيط موصول
وكنت أضاعف الألف ألفين!
وأتمنى أعيش عمري
فقربك.. عمرين
وأتمنى أعيد أيامي معاك!

وأتمنى أعيش تاني هواك!

كتبت بكل ألوان الشعر
لأجل في يوم أقولك
إن قصايدى في يوم هتوصلك!
وساعتها تدور عليا
تلقاني في ملكوت الله
وكلامي هيجيلك ويحكيلك..
ع اللي كنت نفسي أعيشه معاك

لعل وليت وبكل حروف الرجا مستني
ده ظن العبد في الرب عمره ما يجلي
ربك كريم، عادل كتر دعاءك
يمكن تكون دعوتك ساعة استجابة

تقبلي..



وأسيب حضنك وأروح على فين؟
اليوم في بعدك عني سنتين
بواقى الحب في عنيا
ورعشة إيدي في سلامي
ولسه اللهفة عليك في كلامي
قوليلي خلاصي منك يكون ازاي؟
ويجي الشتا عليا
فاشرب قهوتي وأنا مرتاح

وأمني ليا وخليكي واثقة
إني هكون لك ضهر يحميك
وسند إن تقعي يقويك
هكون لك بيت تحزني تدخليه
وأقل بيانه وشبابيكه
وفيه أخبيك
وإيدك في إيدي

وأثبت لحد النهاية
وعينك في عيني
وأبدأ بيك الحكاية

وشمالي فيها وردة
ويميني فيها إيدك
وأسلم عليك
وأديكي وردتي
يا كل جتتي
وأحلى ابتسامة تنور ديتي
أنا مش بتقل
أنا ليك ميال
ولوع الحب
في جوايا ليك متشال
أبوس إيدك كنوع من الإتيكيت
ولو هلة أطلع خاتم حبنا
تقبلي أكمل نص ديني؟
تقبلي أكون لك ضهر يحميك؟
تقبلي ففرحك أكون أنا الموجود؟
فستانك الأبيض يكون ليا
يقول الناس خلاص هي

وحشتني ضحكك وطلتك البريئة
وأتمنى الزمن يسمح ولو لمرة
وفستانك الأبيض يرضى عليا

ملا محك كلها وحشاني
وأحس بحاجه نقصاني
أتمنى لحضني أضحك
وبيك ومعك تحلو أيامي
لهجة كلامك قهراوية
عيونك خطافه بُنية
وقعت ازاي أنا في حبك
ولا بعدك ملت عيني صبية

بحبك حُب ماله مثال
نفسي أحسن بيك البال
وأرسم عالم من تأليفي
ويبقى الحال غير الحال

يا نجمة عالية في السما..



خدي اللي يحبك
ويرسم ضحكتك على وشك
دبلتك تكون نور إيديه
وزعلك مصيبة كبيرة
وفرحك مهمة صعبة
يجبيلك كل الدنيا بين إيديك
يسرح ساعات ف عنيك
تكوني له شيء ميتكرر
وبعد حبك خلاص مفيش
صبية زيك تملئ العين
وإن حضرقي روحك تملئ المكان
يا بخته اللي اتنى بيلك
وعتمة ليله بقت ونساة
هيصون عهدك لأجل ترضي
تفضلني عمرك الجاي وياه
وتعيشي السنين بحلوها وُمرها معاه
تكوني ليه نجمة عالية في السما

يطولك لما يقدم كل الهنا
ييقالك دوناً عن الكل
يقدم كل يوم في صباحك الفل
في عز الغربة تكوني ونسه
يرجعلك يحس أنه في وطنه
لا يمل ولا من جنونك يضايق
وبيك يكون باله رايق
يكون ممتن لترتيبات القدر
وإذا غبت عنه ليلة
تعيش عينيه الحيرة والسهر

آخر قصيدة...



عاتبك ع غيابك
ولفراقك قلبي لومت
ويوماتي محاط بذكرياتك
وأتمنى لو ليك كنت
وقلوبنا طول الوقت حاضرة
ولمحت في عينك إن أنا هونت



مغرمين وقلوبنا كلها حب
والواقع أصبح كله كذب
وراحة البال مبعثش موجودة
من بعد ما سبتيني!
واتأكدت إن الحب أكذوبة



نسيتي الحب اللي كان
قولتيلي ماضي وفات
سبتيني وحيد للزمن

وطعتني قلبي للممات
حاجة غريبة جوايا
بتجعل روعي تشتاق لك
وبرغم كل اللي عدى
والحزن اللي عليا قوى
عنيا ملقتش حد يملئ مكانك
وتوحشيني
ولهفتي تظهر فملاحي
وكان بإيدي ايه؟
غير إني ألجأ لصورك المكونة
وأرضي حنيني بضحكة قديمة
وافتكروقتها ذكرى جميلة
وليا لي الضحك وسهرتنا الطويلة
وقتها مكنش في إيدي غير البكا
وحسرة إنك بعيدة

فاكرة حبك لعصير الجوافة
-وشبشبك- اللي عليه وردة
وسط البلد وقهاويها
ونكتك القديمة اللي بضحك عليها
ودنيا كنت عليا تمليها

وضحكة كنت أنام وأصحي أردد فيها
وندمت إني محبتكيش
وسيتك كتحفة ع الهامش
ويعيبك إي يا ست الحسن؟
جمال وقيمة وأصل
أعيش واشوفك لغيري
وحبك يكون ليه؟
وأجبرتي خلاص تنسيني
أنا اللي عشت لهواك
ونصيبني أعيش عذابي
واستناك لو ترجعي تاني
وتقولني إن أنا ليك

يوم مفارق ديتنا متزعليش
امسك دموعك متبكيش
فالسما هكون عايش
ولأحلامك هكون زاير متقلقيش

اسمعوا وصيتي
خلوا بالكوا من أمني
دي كانت دايمًا شايلة همي

خلوها تفرح ما تبكي
وابقوا سلملولي
عَ قرايب كانت بعيدة
وأصحاب كانوا فترات
ووشوش فـ ضهري نهشت
وسند كان فيا يشمت
قولوا لهم مشي وفات
قولولهم التراب بقا ليه بيت

آخر قصيدة أكتبها لك
وآخر حياة هميشها لك
وآخر غرام مني يبقالك
وآخر عيون تلمح جمالك
وآخر دقيقة عنيا تشوف خيالك
وآخر مرة هتابع أخبارك
وآخر مرة هشتقالك
وآخر مرة حروفي هتوصلك
وآخر مرة هتغني بجنابك
-محمد عماد- فارق دنيتك
وقصايده هي اللي ببقالك

لقاءنا مكانش في الأرض
وبعد عمر مديد ليك
في السما يمكن من تاني
نتقابل..

اسأل عليا...



قالوا لي كثير عنك
إن ما ليك مثال
قالوا لي إن جمالك
حاجة تخطف البال

قالو لي حرّص من عنيتها
ومن السهر فلياليها
ومن اللخمة اللي هتبقى فيها
ولما تشوفها وتلمح طيفها
وتراجع ذكرياتها وتسمع حكاويها

أقولك سر؟
تعالى نهرب من هنا
تعالى ننسى الناس
تعالى نعمل دنيا
نكون فيها أنا وأنتِ
وتالتنا الحب والإحساس

ونرمي همومنا ورانا
ونقول للدنيا تنسانا
ونعيش يا حبيتي ف هوانا

أعوضك سنينك الفايته
وبأيدي آخذك للجنة
وتهون الدنيا بمشاكلها
ونقفل أبواب الحزن كلها
ونعيش أيامنا بمُرّها

السر أنتِ!
وسرك فييري
وبيري فقلبي
ويا بخت من حفظ سره وخاف عليه!
لعنين الناس واسعة
وأخاف يا حبيتي
سري ييوح قدامهم وأخسره

اسألني عني؟
واوعي تنسي هوايا
ولو غبت عنك يوم

ولو قلبي منك بقا محروم
ولو حياتي بقت كلها غيوم
مطرّي مطره تملّى روحي
وداويلي آثار جروحي
ولو قالولك هاجر بعيد
ولو قالولك إني سعيد
وأشاعوا إن في حياتي حب جديد
اسألني عليا متنسنيش
ازاي تصدقي إني أعيش؟
ده أنا من دونك قلبي وحيد

لاموني الناس ع حبك
وراهنت بكل ما أملك
إنك في بيتي ساكنة
إنك هتكوني موجودة
خسرت وبيعت كل ما أملك
وخلصت خلاص الحدوتة

أخلصت وكنت أتمنى لو تبقي لي
ازاي تقولي إني نسيتك
وذكرياتك مالية كل سنيني

أنسى إزاي..؟

ليه فكل الأماكن موجودة
خيالك في كل الناس
أحب إزاي أنا غيرك؟
وقلبي اللي راح وياك بلاش

قابلت الجميلة بخدود وردي
والفرعة اللي عنينا عسلي
ودي تلمح، ودي بتهواني
وواحدة تقولي إنك بيعاني
وإن قلبك عاش لحد تاني
ولسه فخيالي أمانى
قلبي المريض بيرفض إنه ينسالك
وعقلي يقولي إني هلقاك

أنسى إزاي وأعدي جمالك؟
وأنسى إزاي يا حببتي كلامك؟

ده جمال ف عنيا زي النور
وعيون عسلية مثل الحور

مقارنة بسيطة بين حاجتين
وانت معايا حبيتي سعيد
وإن بدونك شخص وحيد
يا وطني وأهلي وعزوتي
يا ذكرى أحكيها تسبقني دمعتي
واسم يتقال تسبقني لهفتي

حبيتي بخت الدنيا كان فيك
ويارتني شوفتك من زمان
دنيتي بقا ليها طعم وحييتها
وحستني ف دنيا أمان
تسمحيلي أعبر ليك عن حبي
وأفضل فيك أنا عثمان

كُتِرَ الفراقُ..



كُتِرَ الفراق يسيب جواك خذلان
تتراكم عليك ليالي كلها حرمان
كأنك غريق وسط بحر أحزان
دموعك تنزل من الشجن
ده كل ذكرى سايبة أثر في مكان

حلوين لما بنحب
وقلوبنا طائرة من الفرح
مش كل من حب اتحب
داوي الجرح، داري الوجع

من مسك إيدك فساب
عن حياتك خلاص غاب
فغيابك عنك عاب
اللي جنبك بيه تكسب
واللي هجرك اقفل وراه الباب

كام مرة نمت حزين؟
ولا فيه حبيب سأل عنك
تستنى العطف من إنسان
والأولى تقدم عطفك لنفسك
حصرت نفسك بين أغاني وحنين
سر حان فبحر ذكرياتك
مش كل من فقد عقله مجنون
أحياناً حبك يسرق حياتك

هتعيش حياتك كئيب
وبين الناس هتبقى غريب
تيجي تدور مفيش أصحاب
وأنت وهي بقيتوا أغراب
كبر سنك، شعرك شاب
وبقيت عايش بلا أحباب

عمري اللي ضاع في حبك
مبقاش خلاص محسوب
ولو علياً فأنا نسيته
ورضيت إن ده مكتوب

بتعيد القصة بشكل جديد
وتقول لغيري نفس الكلام
ازاي عرفت تبقى سعيد
ويوماي بتزورني في المنام
فات عمرك ملقتش حد وياه تتكلم
لأنك حبيتها، عشت لها، فمنستهاش
جزاة الحب خدته ألم
ياريتك هويتها؛ فنسيتها، مقولتهاش

تسعينات الإسكندرية..



كان نفسي أكون من التسعينات
والخيال مليان ذكريات
وف غرام بنت الجيران أعيش
والمراسيل جوابات متتهيش
وقت الضيق أفتح شباكي
أشوفها بتضحك فأسرح بخيالي

أقرب شط لنا استانلي
ع البحر نتفق ونتقابل
فستان قصير أزرق طالل
بسرح شعري ع جنب
بنطلون طويل وقميص أسود
وأفندي بطربوش ماسك عود
عبحليم وفيروز والست بيقول
من بشر نمشيها نلاقينا ف الرمل
نتفاجئ فنستغرب ونضحك
مشينا كل ده ازاى معقول؟

معاك الوقت يحلى ويطول
روحنا الرمل فندخل سيما
مترو ولا أمير نحتار
ندخل ريتس لأحمد مظهر
الناس يقولوا فيلم خطير
تحبي تاكلي وتحلي؟
بسترو دس مطعم وحلواني بيقولوا جميل

يفوت اليوم ويالك بسرعة
وسط هدوء ومفیش زحمة
نركبوا مشروع رايح بشر
ندفعوا ليا وليك ٥٠ قرش
جنب الشباك قاعدة سرحانة
عارفك بتحبي البحر كالعادة
مشوارنا كان ساعة إلا ربع
وكنت أتمنى يكون مليون ساعة

فاكرة لما كنت تخاصميني
لما سهرتي تطول وتستنيني
كافيه إيليت كله أجانب
أخاف عنيك تزوغ يا أفندي

وتعجبك واحدة غيري
وغيرك مين يملأ عيني؟

وقت الصبحية فول وفلافل
وعيون بالحب تتقابل
الترام والأوبرا والقلعة
محطة، منشية، محرم بيه
الزمن الجميل راحت عليه

كنت نفسي أكون تسعيني
وحظي خلاني أحضر ألفينات
وتكوني سيندريلاف عيني
وزمنا يسمح ويحين أواني

بيخت اللي حضر حلاوة التسعينات
وكان ليه حظ يعيش فيها
وعاش فيك يا إسكندرية
وصنع ذكرياته بين حواريك

حبیبتي..



حبیبتي

بكتب لیک رسائل جميلة

فدفتر سمیته باسمك

وكل دقيقة ف عمرنا حصلت

امتى اتقابلنا؟

أول نظرة، أول ضحكة

وأهم صفحة ف تاريخ القصة

يوم اعترافي لیک بحب

كان مالي عنیک طول الوقت

حبیبتي

تتمایل شمال ویمین

ده جمال رباني

میجیش یا ناس ع البال

أقول وأطول ف الوصف

ده الحلوة ساقية دلال

قابلتيني ..

وسرقتني جوه أراضيك
واحدة واحدة وهبتك سنيني
سلمت ليك ورضيت
يا أغلى ما شافت عيني
أشوف من بعدك ليه؟
ولو تغيبني تقفل جفوني
يهون العمى ولو ألمح أنا غيرك

كبرتي ..

ولسه حلوة والجمال يزيد جمال
ورغم السن، جواك لسه طفلة
تزعل وتتصالح بكلمة صغيرة
تتدلعي، تغيري عليا حقك
تتعصبي، وبكلمه أعرف أكل أنا عقلك

بنتي ..

وأحس إنك مني مسؤولة
فرحك أولواياني
وأقدم كل ما أملك
لأجل الفرحة تسكن قلبك

وأشوفك طول الوقت مبسوطه

تعيشيلي..

والعمر يعدي وياك ثواني

وأضيف عمري ع عمرك

نعيد العمر ده ثاني

وكان يحلى إلا بيك؟

يا ورد طارح فبساتيني

نسيمه بيشفني عليلي

أستناك..

ولو طوفتي بلاد الدنيا همشيلك

ولو قالوا إني مش هلاقيك

ولو قالوا مستحقش إني أكون ليك

ولو ضاع اللي باقي من عمري

فإني متغرب بعيد عن أراضيك

هستنى أرجع ثاني وطني

وتكوني العنوان الدائم لبيتي

يا بختي...

بحبيبه طلعتها تملئ الكون زغاريد

بعقل للحق ما يحيد
وقلب يحتوي أحزانك
يجدد فيك الأمل
تعيش وياه أحلى أيامك

حبيتي..
أموت أنا فداك
ويحسبوني ف جنتك شهيد

اللقاء نصيب..



دبلت في قلبي أفراحي
لما الهوى مات
وراحت سيرتك
وغابت صورتك
وآخر كلمة بينا كانت
يلا سلام..

أنا عارف
محبتينش
ولا صوتي الملح والعيش

فأنا ليه مستني؟
وبأسرد ليكم أوجاعي
أحب حبيبتني فتخذلني
وتيجي تقولي انساني
وأعيش ليه موجوع؟
أداري الدمعة، وأوزع ضحكة

والمرغوب يكون ليا أنا ممنوع
وأكتب قصايد
لأجل البعيد يحن
الحلم عاش متهني
وسابلي الكلام اللي يأن
ويدمي القلب قبل النن

اللقا نصيب
وعمر ظني مخيب
وأول مرة ظني فيك يخيب
أول لقابينا
لسه فاكر تفاصيله
أول لقابينا
نفسى أعيد تفاصيله
وأقابلك..

والعين تزور العين
يا ورد سقيته حناني
وزهر في أرض مش أرضي
يا سايبة حياتي بإرادتك
ورافض تعيشي ويايا
أنا بتمنى لسعادتك

تلاقي الفرحة وتعيشي وياها

سمعتك من بعيد
بتقولي حب جديد
وعايش ولا على باله
ولا بزور حتى خياله
للمرة الألف ظلماني
وبتبصي عليا من برة
عرفتي إن أنت نسياني
وناكرة الصحبة واللمة

زمان
من صوتي كنتي تعرفي مالي
تقولي احكي لي
وتشيلي عني أحزاني
فات الوقت مستني
فكترت همومي
ولساني واقف مكاني

يارتني أشوفك وأغازلك زي زمان
يارتني أقولك إنك ليا الأمان

فمتنكريش .. وتقولي نسيك
ده قلبي عمره ما يجف
ولا الشاعر حزنه يخف
ويوماقي الشوق عليا ببيان
فارحمي ضعفي وقدري
إن أنا إنسان

الهجر ليه أصول..



قسوة البعد بتنسي
وعمرك ما رُحتي من البال
روحي تروح مني
لو اسمك قدامي يتقال
يا ذكرى يوماتي بتزورني
يا حلم أصبح ليا محال

مبقاش ليا غير حيطاني
وحزني وقلمي وأشعاري
طب أكتب قصيدة وأهجيك
ولا أكتب غزل فعنيك
ولا أعاتبك يمكن تسمعي
يمكن قلبك يحن فترجعي
يمكن تزول المسافات
يمكن نعوض سنين سكات
تداوي فيا جروح سبتيها
وتنسيني كل ليلة كنت بعيد فيها

أقولك إني بدونك كنت
وبيك أكيد هكون
معاك عمري ما هونت
ولا حسنتي محروم
وفأحضائك تضم غيري
وتقول ببساطة ده حبيبي
وتنسي السنين فثواني
ولا تبقي قسمتي ونصيبي

الهجر ليه أصول
ده بينا عيش وملح
يكفيني إني أقول
اللي بينا خلاص بح
الحب مش بالشكل
الجمال جمال الروح
متسوقش عليا دلال
فبعدي عنك هو الصح

مساء الخير..



مساء الخير
لأطهر قلب في الدنيا
بقولك إني مش بخير
لأجمل ضحكة تأسرفي
لأول واحدة تخذلني
وتكبد جناحي
ولا أعرف بدونها أطيّر
لشوارع كتير سهرانة
لأنيني من حكاية خسرانة
لقصة حب منهيّة
لبداية كلها تضحية
لكلام مكبوت جوايا
لروحي اللي عانت ويايا
لشخصي اللي بقا غير
ردي التحية وقوليلي
مساء الخير..

شوفتِ الحاصل بعدك
رامينك بتهم مش فيك
وقالوا أن أنتِ بيعاني
وناسية اللي كان بينا
قالولي أبعد بعيد وأنساك
وأنسي ازاي وأنتِ المنة
يا أطول خط سير
أتمنى أمشيهِ
وأسمع صوتك بيندهني
ويقولي.. مساء الخير

يا كل اللي كان ليا
الحاصل مهوش بإيديا
ظروفي متسمحش
أوقات تجينا حاجات
وجودها مينفعش
يرمينا القدر بسهم العشم
ونبني حكاوي من الأوهام
يزول الحب ويبقى الألم
مفيش أسهل من الأحلام
كتر خيرك

على هذا الجميل
كله واضح بالدليل
سبتي .. وقلبي كسرتي
واللي عدى مش قليل
ياريتك كنت ويايا
ياريتك غير
يارتني أسمع منك كلمة
تطيب خاطري وتحييني
فحني عليا ولو مرة
وقوليلي ..
مساء الخير

بسمع أغاني زمان
وأشوف فيها الحب اللي كان
وصوت الست يونسني
ويسقي غرامي اللي جف
كنت بشتاقلك .. جددت حبك
حيرت قلبي؟
وأهرب من قلبي أروح على فين؟
ليالينا الحلوة في كل مكان
أشوف كل الكلام فيك

ولو بإيدي هعيد تاني الزمان
وأسمع تاني أخبارك
وأعيش وياك تفاصيلك
يا أجمل من بنات جيلك
وفوق جمالك زيدي دلال
ولو في العمر صدفة
هتمنى أقولك..
مساء الخير

ابعتلي جواب قول أي كلام
طمني عليك وابتعلي سلام
أنا ليك ومعاك وعاش وياك
بتزورني يومياتي وتقولي غرام
ابعتلي جواب قول إني حبيبك
وإني هسيب الدنيا وأجيلك
وإن عنيك شايقة خيالي
ابعتلي جواب واحكي لي الحاصل
وإن الحب في قلبك واصل
ابعتلي جواب مشتاق أنا ليك
حنّ عليا الله يخليك

وإياك تنسى الوعد في يوم
عُمر ما كان الحب هموم
ولو عليا أتمنى أحلي بيك أيامي
وأبعثلك يوماتي سلامي
لأجل تردي عليا في يوم
وتقول لي مساء الخير

سلامي ليك يا ناسيني..



سلامي ليك يا ناسيني
يا أجمل ما شافت عيني
وهبتك كل أيامي
ازاي تقبل تكون لغيري؟

فدنيا كلها مصالح
ف عيني كنت البطل
وشخصي المفضل الصالح
تيجي أحكيك عن سر
بدايته بتبدأ بيبك
كل اللي قبلك مُر
ومعاك الحزن مر
وياك ولا تغيب عن بالي
شاغلني واسمك غنوه فلساني
وصوتك طول الوقت ف مسامعي
ولمعت عيونك البني سحراني

وليه الشوق يغلبني
وليه يا حبيبي تنساني
عاشق وحلمي بسيط
وأملني تنسى نسياني
بسمع لسه فيروز
ودني معاها وعيني على الباب
"تبقي ميل، تبقي اسأل"
"مثل الأول، ضل اسأل"
فاوعى تقولي مشغول
وأنت في بالي علطول
سرحت بخيالي يمكن ألقاك
وترضى الصدفة عني
وأعوض حاجة من اللي فات
الشوق يوماتي بيزورني
وهواك يا حبيبي غلبني
طال بعدك وأنا مستني
ترجعلي تونسني
عيشت كتير بدونك
في جوفي كتير أسرار
هيجي الوقت وأحكملك
كل لحظة انكسار

يمكن ألقاك؟



دنيا جميلة أنت مش فيها
أعمل إيه أنا بيها؟
حلاوة الدنيا فيك أنت
وإن كان عليا هويت
يا آخر صبر ط زورني
وبطلة منك نسيني
العهد زي ما هو
وأملني تنسى فتجيني



العين مشتاقة لعيونك
بتتمنى لمحة من طيفك
بختي إني أكونلك
ولا أقدر أشوف غيرك
الحب كلمة جميلة
حسيت بيها معاك
لما أول دقة
دقت عشان بهواك

كل الأماكن ريحتك لسه فيها
والشوارع حافظة الخطوات
كل البشر بيدوروا جوايا
عن حب خلاص مات
عافرت أنسى وأعيش لحالي
تتجمع ذكرياتي في ليلي
وتخليني أنسى إني ناسي
حاولت أشوف غيرك وأكمل
لقتيني بشوف الكل مش كامل
لقتيني بشوف الكل أنت
وفي وسطهم بقيت تايه

يمكن ألقاك؟
ويمكن ظني يصيب؟
معقوله أستناك؟
فمكاني تسبني وتغيب!
ولا هعيد القصه تاني معاك
ولا مع غيرك هعيد الحب
معقولة أشعلل نار أشواقي
لشخص أحبه فينسحب
ولوع اللي بينا

ده كله خلاص مات
خدت كتير من عمري
ويارطني أعوض اللي فات
هو انا اتسرق..

يتجدد فيا الشوق لحكاية خلصانة
كأن الحب جوايا شايله أمانة
قلبي اللي كانت دقاته مسموعة
وعنيا اللي كانت مَ الدمع ممنوعة
وسنيني اللي ضاعت بلاش
وحزني اللي جوايا عاش
وآخرتها رسيت إني وحيد
كترت فوشي التجاعيد
وطريقي اللي بقا مسدود
مبقتش عارف أعود

لما بتوحشيني
بسأل قلبي عليكِ
وأضم اللي باقي منك
وأردد صدى صوتك
جايز تسمعيني!

وتجيني مكسرة المسافات
حبي ليك كغنة
وحروف كلامها أشعاري
وضحكك ليا كمزيكا
وصوتك بيكونلي ألحاني
بتسأليني بحس بإيه؟
لما بتيجي في بالي
والوقت فات ازاي؟
وازي أحوالي؟

يا ترى هنرجع تاني
ونعيد هوانا اللي اتسرق
يا ترى الفرحة تصالحني
وتطفي نار قلبي اللي اتحرق
قوليلي إنك فكراني
وإنك لأخباري مهمة
قوليلي إنك ريداني
وإنك ليا ممتنة
قوليلي دايمًا بكون وياك
عمرى حبيبي ما انسى هواك

بنحبوك بالاسكندراني..



متمنوش نكونوا غيرك
يا ساكنه القلب والروح
نروحوا معاكي آخر الدنيا
في حبك كل شيء مسموح
ولو فد العمر لحظة
نتمنوا نعيشوا ليك
ولو في العمر صدفه
نحبوا نشوفوا خطاويك
أمواجي بقت ساكنه
حنّي الله يخليك
والمرسي أبو العباس مشتاق
ووحشني نظرة عينك
أيوووه لو تيجي وتشوفني
وتلمح عينا الفل
منشيه والقلعة واستانلي
والبحر بيقولك طل
لسه الرمل زي ماهي

حافضة الخطاوي ما بتمل
بطول البحر من بشر للقلعة
بنحبوك وعمر الحب ما يقل
أدفع للدنيا ما أملك
وأشوفك لو لحظة تاني
أيوووه لو تيجي أقولك
وتسمع مني الحكاوي

هويت الوحدة



جوايا أشخاص باهتة اللون
ومش عارف بكتب لمين؟
الشوق يومياتي بيزورني
لأشخاص مشيوا من سنين

هويت الوحدة واعتزلت الناس
من بعدك مبقاش جوايا إحساس
ويزورني طيفك فالمنام
أمسك إيدك فأصحي .. وأهي أحلام
سرير وأوضة ضلمة وسما ونجوم
حزين وقلبي ضلم من الهموم

مشاكل كتير وكلام فاضي
كأن الدنيا حلفت ما تهيني يوم
ولا تخلي عنيا تعرف طريق للنوم
صدومات م القريب قبل البعيد
ووقت الحزن ببقى وحيد

نفسى أدور ألاقي حبيب
يفضل جنبي ميسبنش
آخذ عنه ويشيل عني
يحفظ سري ويصون قلبي

من برة الضحكه مرسومة
ومن جواك شخص حزين
وتعمل سامع فوسط لمة
والفكر شارد فالأنين

نفسى أرتاح وأعيش فبراح
نفسى أداوي كل جراح
سبوني ف حالي ... سبوني أعيش
أنا من دونكم هبقى سعيد

تحكي لمين وتطلع سرك؟
بكره معاك وبعده يزللك
حتى الحب يا لهوي عليه
كتبوا كتير وحكولي عنه
كان نفسى في يوم أكون من أهله
وأكون مع شخصي المفضل

بس الحب كله خيال
وحي مؤلف جوه كتاب
عمر الحب مكان أقوال
دائمًا فعلك اللي بيثبت
كُتر الحب يجيب تجاعيد
يجعل منك راجل كهل
خلي الحب يلف عليك
ويبقى وجودك شيء مش سهل
اللي يحبك يبغي لذاتك
ينسج خيوط من الفرحة عشائك
ولا هيهمه فلوس ولا شكل
ده اللي هيبقى الروح والعقل

برسل سلام..



برسل سلام ليك
من أرض انتِ مش فيها
ومن بعد مَ كنا اتنين ف دنيا واحدة
سبتيني وبقيتي ف دنيا تانية
برسل غرام لقلب عايش لغيري
وسابني وأباح لنفسه حرمانِي
برسل نظرات يمكن عيون تتقابل
عيون شايله كلام كثير
وواقع مكنش بالساهل!

يروح عيد وييجي عيد
نسيت طعم الفرحة
نسيت ازاي أبقا سعيد
كان نفسي أقول جاني العيد
ونضيف مناسبة جديدة لحبنا
وجملة أستناها منك ليا
كل سنة وأنت معايا

يا عيديتي وعيدي وهديتي
يا عمري اللي جاي
وكل دقيقه بتمر فدينيتي

يصح الورد يسقيه إلا اللي زرعه؟
ف ازاي تزهرى ف أرض أنا مَش فيها
بستان حياتي بيكي - يا ورد - نور
قُطفتي!
يا وردة كنت أملّي عنيا بيها

واستنى أشوفك صدفة
ولو من بعيد لبعيد
وأتمنى أقولك إني
من بعدك بقيت وحيد

أينعم مستنيك!
وفاكرك وفاكر كلامك
وفاكر كل حكاويك
ومنين بتسألني عليا
ومنين بتقول نسيت
في آخر مرة

فاكر كلامك ليا
وصوتك من وقت للتاني
بيرن فوداني!
تقولي انساني وانسى حبي
امحي شريط ذكرياتي
معقوله حبي ليك كان داء
ولقيتي دواه مع حد تاني!

وأشرب عشان أنساك
وف عز سكري
أخطر ف باسمك
مهربش منك
كأن الطرق منها ليك
كأن الطرق كلها أنت
صدقيني...
أنا مش عارف أكون غير ليك

بناديك..
وأعلي صوتي
يمكن يوصل لمسامعك
يمكن فيوم تدقي باب قلبي

يمكن تحني فترجعي

كل اللي حبوا اتسابوا
على الأطلال قعدوا باكين
صدقوا الحب فاتباعوا
ومن عمرهم ضاع سنين

وبقينا ماضي..



وردتي دبلت
من كتر ما أنا مستني
وسنيني بتعدي
ياريت الحوا تسمعني
وإن كان عليا
فكان نفسي أزرك
قلبك كله ورد
وأسقيه يوماتي حبي
ووقت ما يزهر قلبك
أتنسم ريحته
في هذا الهواء الطلق!
ولو علينا قلوبنا تايهة
قلوبنا صابها مرض
التعلق بناس فانيين!
وكأن قلوبنا خرابة
فات عليها زمان
وأصبحت من زمن التسعين!

كل اللي ييجي يسكن له ليلتين
ويهجرها!

ويتركها بجرحها سنين وسنين

بقينا نخاف نقرب
لجراحنا تزيد عمقها
ولو بقينا على حالنا
تفكيرنا في اللي باعنا
يوسع جراحنا
ولا نعرف نلمها!

مين اللي قالك
خد اللي بيحبك!
واوعى تفكر تاخد اللي قلبك
عايش ليه!
كلها أقوال ويضيع عمرك
قدام عنيك!
هتعيش مرة واحدة
فاوعى تجبر نفسك
ع شخص عُمر ما قلبك حس بيه

اتنين يفشلوا ف قصة حب
يعاندوا بعض بشكل غريب!
ده يخطب!
ودي تتقري فاتحتها!
فاكرين انهم عايشن مرتاحين
جواز تقليدي!
يا عم عادي!
فاكرينها سهله وشيء طبيعي!
تجبر قلبك يبقى قاسي!
وف الآخر..
مين هيدفع تمن كل هذه المآسي؟

وبقينا ماضي..
وحكايتنا خلصت وكل اللي بينا راح
جمعتنا الدنيا سنين
وف ثانية ريحها كان قوي
خد قلبك معاه
كورقة اتحرقت ورمادها طار
واللي راح يا حبيبي راح

ورغم إنها بقت ماضي
وحبه بقا شيء فاضي
ما زالت روحه تعبانة
وباله بيها طول الوقت مشغول
من شم ريحة الورد وشاف جماله؛
تحرم عليه عطور الدنيا
وتدبل في عينه نساء الكون

كان يا مكان..



يسألوني عنك؟
أنكر إنك كنتِ موجودة
أخاف لساني ينطق
بحاجات كثير جويا مكبوتة

وازاى أنساكِ؟
وعنيا لمحة طيفك
مغبش عنها لثواني
يجوز أنا اللي سبتك
وقدام الناس بيان
أنك أنتِ اللي سبتيني
يجوز بقول إني نسيتك
وانتِ فبالي علطول
يجوز إني محتاجلك
وغروري يمنعني إني أقول
وتلف الدنيا وتدور
وأنا فين وأنتِ فين؟

معقول كنا واحد
ودلوقتي بقينا خلاص
اتنين ..

كان يا مكان
كنت بحب واحدة جميلة
كانت عاملة خضرة شريفة
عينيه بدأو حكاية
كلمة ف جملة بقينا حبايب!
يوم ف الثاني بقينا عشرة!
حب وسهر طول الليل
تزعل، تسكت أجري عليها
مكالمة طويلة فتضحك فيها

كان يا مكان
ونسيت اللي كان
رقمي مسحت وصورتي رميتها
فاكر إنك كده حلتها!
واخذ خيرى وناكر فضلي
ناسي كلامي وكاره حبي
لغيري تعيش وتكون مبسوط

وقلبي بقلبك بقا مربوط

حاسبي!

اوعي تفكري يوم ترجعي

ولا هديلك فرصه وسمع

بدونك ناقص

بدونك غايب عني حاجات كثير

ساعات الناقص بيكون كافي

الناقص كثير ف حياتي

ونقصي الكبير هو أنتِ

والنقص عادة وعودتي

إني أكون فيك أناني

وف غمازتك أقول آه ياني

وإن الضحكة ديا عشاني

وأنت معايا..



مين اللي قال إن كل الحلويين
بيجوا مره واحدة ف الحياة!
م أنا شوفت واحدة بكل الحلويين
ولسه متتهنش الحياة!

وأهو جاني الحلو أبو ضحكاية
غيرلي فكرتي، نساني اللي جوايا
ده الجميل اللي قالوا عنه
إنه جميل ملوش مثال
بضحكاية فوق الخيال

وإن عابول!
وإن قالوا إنك عادي
وإن قالوا حبك فاني
وإن قالوا مهما قالوا
هكتبلك شعري
واتعلم طرب!

وأغنيك أحلى أغاني

تسوى إي أيامي

وانتِ مش فيها!

أقولك إني بحبك

وقلبي ف حبك

عايش قصة

سنين بيحلم بيها

وأسيبك تمشي فين!

من قلبي لا مفر

وعنيك تبص لمين!

النظرة منها تحلي المر

وحبيبي ليلة تغيب

تجعل بالي مشغول

او عى تفوت وتمشي

ده أنا قلبي ليك علطول

وانت معايا نفرح

نجري هنا وهناك

يجي ليلنا علينا
تسرح ف السما
وأنا أبقا فيك سرحان

تفضل حبيبي معايا
وتعيش يا حبيبي ف هوايا
وف قربك أكون فرحان
وتكون لحياتي عنوان

بحبك يا أمي..



ومين يا حبييتي ويايا
وطول الوقت باله مشغول
وليلي ونهاري كضلي
مقدرش عنه أبعد يوم



ونكتب كتير وقلوبنا مليانة
ونقول ونعيد بأمانة
وعيت ع الدنيا وشوفتها
وأول ضمة ليا كان بين حضنها
وأول دمة من عنيتها
وأول فرحة كنت أنا ليها
وأول بسمة لما بقيت ابنها



ويوم بيوم تقويني
تشد من أزري
كلامها طول الوقت بيحيني
وسنة تفوت والابن يكبر

والأم قاعدة ف الحال تدبر
وترسم خطط مستقبلية
نفسها تشوف ابنها حاجه جُهنمية
كالعادة الابن لا يبالي
مراهقة وطيش يوماتي
والأم تغسل وتكوي
والصبح من بدري تصّحي
ووقت تعبك النوم من عنيتها يجري

تتأخر ف ليلة تلقاها ع الباب
كلمة منك ليها حلوة
يتفض الحساب

لما يكون نفسك ف حاجه
وممعكش فلوس!
تجري أول حد عليها
م الحل دايم ف إيديها
يوم نجاحك ف أي شيء
تلقاها ف ضهرك
والفخر ف عنيتها يبيك
هي أمي ومهما كتبت عنها

قصايد متجيش حاجة ف وصفها

بتعدي سنة ..

ويختاروا يوم ليك عيد

وعمري اللي فات بيك عيد

وعمري اللي جاي بوجودك سعيد

ومهما عيشت ومهما شوفت

الأم نيل يشرب منه العطشان

ووقت الضهر كضل شجرة لحران

الأم مهما جازيتها متوفيش

والحب ليها يدوم ميتتهيش

بحبك يا أمي

ولو زعلتك سامحيني

وع الخصام او عي تنويلي

وجودك جنبي مكملني

وطلتك ليا تداوي جروحي

والبسمة منك بتملي روحي

ترد الفرحة فيا بتحيني

علاقات الحب إياها



نسيت وخلاص هكمل
هرجع ثاني أعيش
اللي سابني نسيته
وف بالي لحظة ميحيش

هشوف الدنيا بجمالها
وأعتبرها كوباية
وأبص لنصها المليان
مين قال الحب للأولاني؟
الحب للي يحقق الأمانى
أكونله المفضل وميكونش أناني

قلبك لسه شباب
كل اللي فات كان غبار
إنسى وامحي العذاب
وخد لو لمرة قرار
هتحب ثاني وتعيش سعيد

من باعك زمان
هيتمنى في يوم سلام بالإيد

ردد دائماً باستمرار
أنا جميل وأستاهل الحب كله
مش كامل بس فيا مميزات كتير
الكل يتمنى لقايا
وفي اللي هيبيع الدنيا فدايا

ده اللي ساب ميلزمنيش
ولو دفع عمره ع عمره عشان يرجع
ع عيني خلاص مفيش
كل اللي فاتك مش حقتك
دور مرة صح ع اللي ليك

يمكن قلوبنا تزهر
والبركة تدخل فيها تاني
مش كل الأراضى بور
عيش كطير بجناحات حر
رفرف بيهم بص لفوق

كل اللي سابك مشى
كل اللي حواليك اختفى
إزاي تأمن غدرهم
وكلهم أسباب مسببة للأذى

علاقات الحب إياها
تدخل علاقة تهواها
تسيبك ف نص الطريق
غيرك بالفلوس يملأ عنينا
وأنت الحزين اللي فاكر حكاويها
تقعد شهور وسنين تنساها
وتقول بالصدفة جازي ألقاها
تصاحب صاحبها فتسأل عنها
فلانة.. كان من يومين خطوبتها
اتشبكت بدبلة فشربت شرباتها
نسيت إنك كنت حبيبها

الخاينة الفلوس تغريها
والحب ملوش مكان عندها
العلاقات إياها بلاها
وعيش الدنيا بفرحها ومُرّها

نفسي أعيد من ثاني حياتي
مين هيخفف عني آهاتي
مين هيعد الفرحة دي ثاني
عيدلي الأماكن
عيدلي الصحاب
عيدلي أوقاتنا الحل
اللي راحت خلاص!

قصة حياتي..



سايب بابي مفتوح
ومش هتعلق تاني بحد
وهفضل ليه مستني؟
وأرضي بكلام على القد
هيفرق إيه سبب حزني؟
طالما الصحبة مش جد
تعالني نتبادل المواضيع
وأسمعك وتسمعيني
أقولك كل اللي خذلني
فتمسك إيدك في إيدي
وبكل لغات الحب هتقولني
هشيل عنك وأخفف حملك
أنا اللي بقيالك
يا حبي الأول والأخير
معايا هتنسي أحزانك
مشيت واللي كان كان
ولسه أنا عالق

في بؤرة كلها أحزان
تحاوطني الذكرى
وتلومني الليالي
وأنا إيه ذنبي؟
أحب حببتي فتنساني
الدنيا وحشة أوي
غدرت خلاص بيا
سني مبقاش يشبهني
واللي مني ييجرح فيا
مش فارقة أنا مين؟
كل اللي حبوني
أول ناس صبحوا بايعين
طردت الفرحة من بيتي
ولومت إنها نسياني
أتاري الفرحة هجرتني
وحالفة ما تدخل تاني من بابي
وإيه الفايدة؟
إني أبان ليكوا مبسوط
وأنا من جوه
زعيق أفكاري عالي الصوت
وليه الصمت؟

وأبان ليكوا مكسور

أنا فكرت

وخلص بيني وبينكم

همني سور..

ميهمش هتقولوا إي عني

ولا هتجيبوا سيرتي بياه

يهمني أعيش متهني

وأسمع كلام نفسي

واللي هتقولي عليه

لمين أشكي وجعي

وفي سطور أسرد

كل اللي جنبني باعني

ما لقيت حد عليه أسند

شوارع كتير فاضية

بمشي لوحدي فيها

يمكن ألاق نفسي صدفة

فأعيش ليها!

شوارع فاضية من الناس

جواها ذكريات وإحساس

هنا مشينا، هنا اتقابلنا

وهنا اتولدت نظرة حبنا
فاتني الكل محلي سر
وليلة في ليلة طعمها مُر
شوارعي الفاضية أسلم حل
إني أعيش من غير ما تمل
خيالي معايا يونس وحدة
في دنيا ما ليا فيها حد

شوية صور..



سبنا بعض وفارقنا
وفبالي ألاقى غيرك
يعوضني سنين الحزن اللي فاتت
ينسيني الكسرة اللي جوايا باتت

تفوت أيام، تعدي سنين
ألاقى طيفك فكل العيون
ملقتش حد يشبهك
وبقيت عايش فدايرة إني وياك كل يوم

ولا تشوف عنيا غيرك
ولا قلبي يحس غرام
يفوت عمري فهواك
زوريني ولو مرة ف المنام
فأحلامي قوليلي بحبك
وعيدي حدوة تنسي الآلام

ف لحظة صفا أعاتب زماني
سرق مني أعز أشياءي
وسابني ألف الدنيا.. وأتمنى
تجمعني الصدفة بيك.. من ثاني

رحيل مفاجيء بدون أسباب
واللي حب متحبش واتساب
مراية الحب مش عامية
شوهنا الحب...
وف الآخر طرف منا طلع كداب

كل ليلة لصورك بكون زائر
وأقلب فيهم وأملّي عنيا
صبيبة جميلة، عنيدة قوية
وساعات ضاعت، ورسايل طويلة
ده كل صوره حكاية غريبة
ده حب سنين يضيع فثواني
ويبقى الحب فكرة تعيسة

شوية صور مركونة
بأيديك كتبت عليها ذكرى

لحد هذا الوقت محفورة
صورة فالتانية
وضحكة وبعديها بصة لعنيا
كأن الصور قدامي أنتِ!
وأسرح بخيالي فـ عنك
تروح الغفوة وأفوق من وهمي
دموعي اللي تنزل لفراقك
فينك؟ .. يا كل سنيي؟

ده كل الدنيا تشهد لك
فبعدك قلبي كاليتيم
هجرت بيوت الدنيا وسكنتك
وكنت فـ حبك صعيدي غشيم
بس قانون الحب بيقولك
من ساب حياتنا نعتبره كالنسيم

العمر ضاع..



أنا المخذول
زرعت قلوب الناس
وقلبي بقا بور
أنا المتساب
ليهم كنت أنا صاحب
وفي الآخر مليش أحباب
أنا المنسي
برغم إنهم على لساني
يارتني ما حبتهم
يارتني كنت شخص أناني
أنا التعبان
ولا حد يبسأل فيا
يوماتي أخفف حزنهم
وجوايا ألف قضية
مين بيشلني وقت الحزن؟
مين بيشلني وقت الضيق؟
ليا جمایل كثير عندكم

ومستغني يكونلي صديق

لسه شباب وداخل جامعة

يتمنى سنينه تعدي أوام

الوقت فات ازاي؟

وأحلامه طلعت كلها أوهاام

من عشرينيات لـ ثلاثينات

إحساسه بالحلومات

كان نفسه يعمل شيء صح

يثبت إن المستحيل ممكن

يعافر يمين وشمال

رصاص في جُمل ليه يتقال

كل الحيطان مايلة

كل السبل في طريقه مقفولة

لا أهل ولا أصحاب

كل اللي عدوا صبحوا أغراب

أنا لسه كنت شباب إمبراح

كترت أحزاني وقل الفرح

بقيت من أهل الستين

وكل اللي فاكره زمان

كنت وما زلت حزين

عمري فات ثواني
ولسه الأمانى أمانى
كبر سني بقيت كهل
عشت الواقع..
والواقع عمره ما كان سهل.

هنرجع..



فاكرين إننا سبنا واتخلينا!
عارفين إننا روحنا ونسينا!
وقلوبنا بتتلاقى كل يوم
لأجل تسقي هذا الغرام المكتوم

فاكرينك نسييتي
وعايشه حياتك!
وقلبك دق لحد غيري
وضحكتك شافها حد ثاني
ميعرفوكيش!
إن لو حد غيري
جبلك ورود الدنيا
مبيعجبكيش!
إلا وردتي اللي لونها أورجواني..
أنا أناني!
وإن دق بابك حب ثاني
هكون أنا بشكل ثاني

ولغيري تبقي مستحيل
مين يحبك؟
مين يخاف عليك؟
مين يحطك جوه قلبه الكبير!
وأشوفك وتضحكي
وأسمعك وتفرحيني
وأحكلك وتحكي
هنرجع ونرجع اللي فات
نسمع أصالة
وأحفظ وأقولك كوبليها
وأنام وأنت صاحبة
لمجرد إحساسي بالأمان

أنا تعب، أنا زعلان
نفسي أحبك زي زمان..
بكره يا ورد هتزهري تاني
تملى حياتي حنين وأغاني
أنا مستني فيوم هنعود
ده احنا ما بينا ألف وعود
وأنا على عهدي هكون موجود

مهما خصامنا طال
وجف غرام القلب
بيني وبينك طار
يا سارق سنين الحب.

السيرة الذاتية

الاسم: محمد عماد الدين

تاريخ الميلاد: ١٩٩٩ / ١١ / ٢٩

المحافظة: الإسكندرية

المؤهل الدراسي: طالب بكلية الصيدلة (جامعة ٦ أكتوبر)

شاعر عامية

أعمال:

١ - ديوان (بنت الشرقاوي) ديوان ورقي عن مؤسسة روائع للفنون والثقافة.

٢ - ديوان (رسائل لن تصلك) ديوان إلكتروني عن دار خواطر للنشر الإلكتروني.

تقلدت بعض المناصب الأدبية منها:

١ - مؤسس مبادرة حكاية كاتب (حاليًا)

٢ - شاعر بجريدة المساء العربي

٣ - رئيس اللجنة الفنية والمسابقات باتحاد فرسان القلم

٤ - رئيس لجنة التقييم بمؤسسة سحر الروايات

٥ - رئيس المجلة الإلكترونية بمشروع كاتب

٦ - عضو تحكيم لجنة الشعر والمواهب بجامعة ٦ أكتوبر (كلية صيدلة)

٧-المستشار الأدبي لمؤسسة فرسان القلم (حاليًا)

التكريمات:

١- تكريمي مرتين على التوالي من جريدة المساء العربي

٢- تكريمي من مؤسسة فرسان القلم

أهم الإنجازات:

١- عمل لقاء صحفي مُصور صوت وصورة عن ديوان (بنت الشرقاوي) مع جريدة ٢٣ يوليو.

٢- عمل لقاء صحفي عن سيرتي الذاتية وبداية شغفي لكتابة الشعر في مقال ونشره في جريدة (صفحة أولى)

٣- عمل فيديو تقديمي عن ديوان (بنت الشرقاوي على قناة اليوتيوب (فن ومونتاج)

٤- تحدثت عن مسيرتي الشعرية كثير من المواقع الالكترونية مثل (مؤسسة سحر الروايات، مؤسسة فرسان القلم)

٥- تم ذكر اسمي في مقال ضم مجموعة من الكتاب الكبار في الساحه الأدبية وتم نشره في جريدة (البحيرة اليوم)

٦- ظهوري في لقاء إذاعي لراديو (ف السكة) في برنامج (خدلك كتاب) بدعوة من المذيعه/ ولاء مديح

٧- طرح ما يقرب من أكثر ١٠٠ قصيدة على السوشيال ميديا على (الأكونت الشخصي والبيدج الرسمي الخاص بي على الفيس بوك وتويتر)

- ٨-نشر ٦ قصائد صوتية على قناة اليوتيوب الخاصة بي بالتعاون مع مصممين مبدعين ونشرهم أيضًا على أبلكشين (ساوند كلاود وبعض منهم على موقع أوتاريكا على جوجل)
- ٩-تم عرض ديوان بنت الشرقاوى على موقع (نيل وفرات) الموقع الأشهر في الوطن العربي لتسويق الكتب إلكترونيًا
- ١٠-توقيع ديواني الأول بمعرض القاهرة الدولي للكتاب ٢٠٢٠ بحضور الشاعر السعودي الكبير/ ياسر العتيق، وحضور أكثر من ١٠٠ شخص في أول حفلة توقيع
- ١١-انتهاء الطبعة الأولى من ديواني الأول (بنت الشرقاوي) عقب انتهاء معرض القاهرة الدولي للكتاب ٢٠٢٠
- ١٢-سنة ٢٠١٩ بجريدة المساء العربي كان يصدر كل خميس من كل أسبوع قصيدة أسبوعية على الجريدة خاصة بي
- ١٣-قريبًا التعاقد مع بعض الفرق الشعرية لتقديم حفلات على بعض المسارح بالقاهرة والإسكندرية
- ١٤-إصدار سلسلة (كيف تنجح؟) لتشجيع المواهب الصاعدة على الكتابة وتوضيح بعض الأخطاء الشائعة التي يقع فيها الكتاب المبتدئين

للتواصل مع الكاتب:

Facebook :/
Mohamed Emad

Twitter :/
Mohamed_emad28

Instagram:/
mohamedemad8076

youtube:/
Mohamed Emad Eldeen

الفهرس

1	ليالي القاهرة
6	وأتمنى لو أنساك..
9	وجيتي عَ بالي..
12	قابلتك صُدفَة
17	براقبك من بعيد..
21	تقبلي..
24	يا نجمة عالية في السما..
26	آخر قصيدة...
31	اسأل عليا...
34	أنسى إزاي..؟
36	كُثر الفراق..
39	تسعينات الإسكندرية..

- 42 حبيبتى..
- 46 اللّقا نصيب..
- 50 الهجر ليه أصول..
- 52 مساء الخير..
- 57 سلامي ليك يا ناسيني..
- 59 يمكن ألقاك؟
- 63 بنحبوك بالإسكندرانى..
- 65 هويت الوحدة
- 68 برسل سلام..
- 72 وبقينا ماضي..
- 76 كان يا مكان..
- 79 وأنت معايا..
- 82 بحبك يا أمي..
- 87 علاقات الحب إياها
- 89 قصة حياتي..

93	شوية صور..
96	العمر ضاع..
99	هنزجع..